

UNDANG – UNDANG KECIL

CETAKAN SEMULA

**UNDANG-UNDANG KECIL
PUSAT SIBER DAN KAFE SIBER
(MAJLIS BANDARAYA SUBANG JAYA) 2007**

Mengandungi segala pindaan hingga 10 Disember 2020.

DITERBITKAN OLEH
JABATAN UNDANG-UNDANG
MAJLIS BANDARAYA SUBANG JAYA
2021

AKTA KERAJAAN TEMPATAN 1976

**UNDANG-UNDANG KECIL PUSAT SIBER DAN KAFE SIBER
(MAJLIS BANDARAYA SUBANG JAYA) 2007**

SUSUNAN UNDANG-UNDANG KECIL

BAHAGIAN I

PERMULAAN

Undang
-undang
kecil

1. Nama, permulaan kuat kuasa dan pemakaian
2. Tafsiran

BAHAGIAN II

PELESENAN

3. Larangan pusat siber atau kafe siber tanpa lesen
4. Permohonan lesen
5. Lesen tidak boleh dipindah milik
6. Fi tidak boleh dibayar balik
7. Deposit
8. Pengantungan atau pembatalan lesen
9. Tempoh sah lesen
10. Membaharui lesen
11. Lesen hendaklah dipamerkan dan dikemukakan
12. Lesen sementara
13. Ketidaklayakan
14. Larangan

BAHAGIAN III

PEMEGANG LESEN DAN PEKERJA

15. Pemegang lesen
16. Buku daftar
17. Daftar pekerja
18. Pemeriksaan kesihatan
19. Kebersihan pekerja

BAHAGIAN IV

PREMIS

20. Larangan mempamerkan iklan tanpa lesen
21. Waktu menjalankan perniagaan
22. Pelanggan di bawah umur dua belas tahun
23. Lokasi
24. Kebersihan premis

BAHAGIAN V

PENGUATKUASAAN

25. Kuasa masuk dan memeriksa
26. Pengeledahan
27. Pemeriksaan orang perempuan
28. Penyitaan
29. Pelucuthakan
30. Pelucuthakan jika ada pendakwaan
31. Pelucuthakan jika tiada pendakwaan
32. Tiada kos atau gantirugi berbangkit daripada penyitaan boleh didapatkan
33. Kuasa untuk menutup premis berlesen
34. Kuasa menangkap
35. Majlis tidak bertanggung atas kehilangan atau kerosakan
36. Halangan, dsb.

BAHAGIAN VI

PELBAGAI

37. Pendakwaan
38. Pengkompaunan kesalahan
39. Penalti
40. Peruntukan peralihan

JADUAL

AKTA KERAJAAN TEMPATAN 1976

UNDANG-UNDANG KECIL PUSAT SIBER DAN KAFE SIBER
(MAJLIS BANDARAYA SUBANG JAYA) 2007

PADA menjalankan kuasa yang diberi oleh seksyen 73, 102 dan 102A Akta Kerajaan Tempatan 1976 [*Akta 171*], Majlis Bandaraya Subang Jaya dengan ini membuat dan menurut Seksyen 103 Akta tersebut, Pihak Berkuasa Negeri mengesahkan undang-undang kecil yang berikut:

BAHAGIAN I

PERMULAAN

Nama, permulaan kuat kuasa dan pemakaian

1. (1) Undang-undang kecil ini bolehlah dinamakan **Undang-Undang Kecil Pusat Siber Dan Kafe Siber (Majlis Bandaraya Subang Jaya) 2007**.

(2) Undang-Undang Kecil ini mula berkuat kuasa pada 19 Julai 2007

(3) Undang-Undang Kecil ini hendaklah terpakai bagi kawasan pentadbiran Majlis Bandaraya Subang Jaya sahaja.

Tafsiran

2. Dalam Undang-Undang Kecil ini melainkan jika konteksnya menghendaki makna yang lain -

“dadah” hendaklah mempunyai erti yang sama di bawah Akta Penjualan Dadah 1952 [*Akta 368*];

“hiburan” hendaklah mempunyai erti yang sama yang diberikan kepadanya di bawah Enakmen Hiburan Dan Tempat-Tempat Hiburan (Selangor) 1995 (Pindaan 2001);

“kafe siber” ertinya premis berlesen yang menyediakan kemudahan komputer untuk melayari internet serta menjual makanan dan minuman kepada pelanggan ;

“komputer” hendaklah mempunyai erti yang sama yang diberikan kepadanya di bawah Akta Jenayah Komputer 1997 (Akta 563);

"lesen" ertinya lesen yang dikeluarkan di bawah undang-undang kecil 4;

“Majlis” ertinya Majlis Bandaraya Subang Jaya;

“Pegawai Kesihatan” hendaklah mempunyai erti yang sama yang diberikan kepadanya di bawah Akta Kerajaan Tempatan 1976 (Akta 171);

“Pegawai perubatan” ertinya seorang pegawai perubatan yang digaji oleh Pihak Berkuasa Melesen atau pegawai perubatan yang berdaftar di bawah Akta Perubatan 1971 [*Akta 50*];

"Pihak Berkuasa Melesen" ertinya Datuk Bandar atau Setiausaha suatu pihak berkuasa tempatan atau mana-mana pegawai yang diberi kuasa secara bertulis oleh Datuk Bandar;

“premis berlesen” ertinya mana-mana premis yang menjalankan pusat siber dan kafe siber seperti yang dilesenkan oleh Pihak Berkuasa Melesen di bawah Undang-undang Kecil ini;

“pusat siber” ertinya premis berlesen yang menyediakan kemudahan komputer untuk melayari internet;

“Datuk Bandar” ertinya Datuk Bandar Majlis Bandaraya Subang Jaya.

BAHAGIAN II

PELESENAN

Larangan mengadakan pusat siber dan kafe siber tanpa lesen

3. Tiada seorang pun boleh menjalankan perniagaan pusat siber dan kafe siber tanpa lesen yang dikeluarkan oleh Pihak Berkuasa Melesen di bawah Undang-Undang Kecil ini.

Permohonan lesen

4. (1) Suatu permohonan untuk mendapatkan atau memperbaharui lesen hendaklah dibuat mengikut apa-apa bentuk yang ditentukan oleh Pihak Berkuasa Melesen.

(2) Pihak Berkuasa Melesen boleh mengarahkan mana-mana pemohon supaya hadir sendiri atau dalam hal suatu perbadanan atau firma, oleh seorang pengarah, pekerja atau mana-mana orang yang diberi kuasa oleh perbadanan atau firma tersebut, semasa permohonan dibuat.

(3) Mana-mana pemohon hendaklah membuat pembayaran fi pemprosesan seperti yang ditetapkan di dalam Jadual Kedua semasa permohonan dikemukakan dan fi pemprosesan tidak akan dikembalikan sama ada permohonan diluluskan atau tidak diluluskan oleh Pihak Berkuasa Melesen.

(4) Apabila permohonan itu diluluskan, Pihak Berkuasa Melesen hendaklah mengeluarkan lesen yang tertakluk kepada –

(a) pembayaran deposit seperti jumlah yang ditetapkan oleh Majlis sebagai jaminan untuk memastikan bahawa peruntukan Undang-Undang Kecil ini dan syarat lesen dipatuhi;

(b) pembayaran apa-apa fi yang ditetapkan di dalam Jadual Pertama; dan

(c) apa-apa syarat atau sekatan yang dinyatakan di dalamnya.

(5) Lesen tersebut hendaklah dalam bentuk sebagaimana yang ditentukan oleh Pihak Berkuasa Melesen.

(6) Pihak Berkuasa Melesen boleh mengeluarkan lesen bagi tempoh tidak melebihi tiga tahun dan boleh diperbaharui tertakluk kepada permohonan pembaharuan yang dibuat kepada Pihak Berkuasa Melesen dan bayaran fi sebagaimana yang ditetapkan dalam Jadual Pertama.

Lesen tidak boleh dipindahmilik

5. (1) Suatu lesen yang dikeluarkan di bawah Undang-Undang Kecil ini ini tidak boleh dipindahmilik kecuali dengan kebenaran bertulis Pihak Berkuasa Melesen.

(2) Permohonan untuk memindahmilik lesen hendaklah dibuat mengikut apa-apa bentuk yang ditentukan oleh Pihak Berkuasa Melesen.

(3) Pihak Berkuasa Melesen boleh mengkehendaki pemegang lesen memberi apa-apa dokumen atau maklumat tambahan sebagaimana yang didapati perlu semasa permohonan dibuat.

(4) Pihak Berkuasa Melesen boleh mengarahkan mana-mana pemohon supaya hadir sendiri atau dalam hal suatu perbadanan atau firma, oleh seorang pengarah, pekerja atau mana-mana orang yang diberi kuasa oleh perbadanan atau firma tersebut, semasa permohonan dibuat.

(5) Pihak Berkuasa Melesen boleh mengkehendaki pemegang lesen untuk menyelesaikan sebarang bayaran tertunggak kepada pihak Majlis sebelum meluluskan permohonan tersebut.

(6) Bayaran pindahmilik lesen ialah sebanyak dua puluh peratus daripada bayaran lesen yang ditetapkan dalam Jadual Pertama.

(7) Mana-mana permohonan pindahmilik lesen hendaklah membuat pembayaran fi pemprosesan seperti yang ditetapkan dalam Jadual Kedua semasa permohonan dibuat dan ianya tidak akan dikembalikan.

Fi tidak boleh dibayar balik

6. Fi lesen yang telah dibayar di bawah Undang-Undang Kecil ini tidak boleh dikembalikan.

Deposit

7. (1) Deposit yang dibayar di bawah subperenggan 4(4)(a) hendaklah mengikut jumlah seperti yang ditentukan oleh Majlis.

(2) Pihak Berkuasa Melesen boleh melupuskan deposit sepenuhnya atau sebahagiannya sekiranya Pihak Berkuasa Melesen berpuas hati bahawa terdapatnya pelanggaran syarat lesen atau sekatan lesen atau pada pembatalan lesen sebelum tarikh tamat atau pelanggaran mana-mana peruntukan Undang-Undang Kecil ini.

(3) Lesen hendaklah terbatal apabila deposit dilupuskan, melainkan dibenarkan oleh Pihak Berkuasa Melesen dengan permohonan dari pemegang lesen untuk melanjutkan lesen dan tertakluk kepada pembayaran semula deposit sekiranya dilupuskan.

(4) Pembayaran deposit di bawah subperenggan 4(4)(a) hendaklah, melainkan dilupuskan menurut perenggan (2), dikembalikan kepada pemegang lesen selepas pemegang lesen menamatkan pengendalian premis berlesen dan selepas penyerahan balik lesen kepada Pihak Berkuasa Melesen sekiranya lesen itu tamat.

Penggantungan atau pembatalan lesen

8. (1) Pihak Berkuasa Melesen boleh pada bila-bila masa menggantung atau membatalkan suatu lesen yang dikeluarkan di bawah Undang-Undang Kecil ini sekiranya telah berlaku kegagalan mematuhi mana-mana peruntukan Undang-Undang Kecil ini atau pelanggaran apa-apa syarat atau sekatan lesen.

(2) Mana-mana orang yang menjalankan atau menguruskan suatu premis berlesen semasa tempoh penggantungan lesen atau setelah lesen dibatalkan adalah melakukan suatu kesalahan.

Tempoh sah lesen

9. Sesuatu lesen jika tidak digantung atau dibatalkan terlebih dahulu hendaklah terus berkuatkuasa dari tarikh pembayaran fi lesen sehingga 31 Disember tahun semasa.

Membaharui lesen

10. (1) Suatu permohonan lesen boleh dibuat kepada Pihak Berkuasa Melesen dengan bayaran fi sepertimana yang ditetapkan dalam Jadual Pertama.

(2) Pihak Berkuasa Melesen boleh mengkehendaki pemohon memberikan apa-apa dokumen atau maklumat tambahan yang difikirkan perlu semasa permohonan dibuat.

(3) Pihak Berkuasa Melesen boleh memperbaharui lesen itu atau enggan membaharui lesen itu dan hendaklah memberitahu pemohon secara bertulis mengenai keputusannya itu.

(4) Pihak Berkuasa Melesen boleh mengkehendaki pemohon untuk menyelesaikan sebarang bayaran kepada Majlis sebelum meluluskan permohonan tersebut.

Lesen hendaklah dipamerkan dan dikemukakan

11. (1) Seorang pemegang lesen hendaklah mempamerkan lesen pada sepanjang masa di suatu tempat yang mudah dilihat di dalam premis berlesen dan hendaklah mengemukakannya sekiranya dikehendaki berbuat demikian oleh Pihak Berkuasa Melesen atau mana-mana pegawai yang diberi kuasa.

(2) Seorang pemegang lesen yang gagal untuk mempamer atau mengemukakan lesen di bawah perenggan (1) adalah melakukan suatu kesalahan dan apabila disabitkan boleh dikenakan hukuman denda yang tidak melebihi lima ratus ringgit atau penjara tidak melebihi enam bulan atau kedua-duanya.

(3) Bagi maksud Undang-Undang Kecil ini, sebutan tentang sesuatu lesen hendaklah termasuk salinan lesen itu yang diperakui oleh Pihak Berkuasa Melesen sebagai salinan sebenar lesen itu dan salinan lesen yang diperakui hanya boleh dikeluarkan tertakluk kepada kadar bayaran dalam Jadual Ketiga.

Lesen Sementara

12. (1) Suatu lesen sementara boleh dikeluarkan kepada mana-mana pemohon sementara menanti keputusan oleh Pihak Berkuasa Melesen ke atas permohonan bagi suatu lesen.

(2) Lesen sementara yang dikeluarkan di bawah perenggan (1) hendaklah sah bagi tempoh tidak melebihi enam bulan dari tarikh ianya dikeluarkan.

(3) Tertakluk kepada perenggan (5), suatu lesen sementara boleh dilanjutkan bagi tempoh tidak melebihi enam bulan selanjutnya atas permohonan secara bertulis oleh pemohon pada atau sebelum tarikh akhir tempoh enam bulan yang pertama.

(4) Tempoh sah suatu lesen sementara hendaklah tidak melebihi tempoh dua belas bulan dari tarikh ianya itu dikeluarkan.

(5) Lesen sementara yang dikeluarkan hendaklah dibatalkan dengan serta-merta apabila permohonan bagi suatu lesen tidak diluluskan oleh Pihak Berkuasa Melesen.

(6) Fi bagi suatu lesen sementara atau apa-apa perlanjutan lesen sementara hendaklah tidak melebihi jumlah fi yang ditetapkan dalam Jadual Pertama.

(7) Pemegang suatu lesen sementara hendaklah mempunyai hak, kewajipan, liabiliti dan obligasi yang sama sebagaimana pemegang lesen di bawah Undang-Undang Kecil ini.

Ketidaklayakan

13. Tiada lesen boleh dikeluarkan –
- (a) kepada seorang pemohon di bawah umur dua puluh satu tahun;
 - (b) kepada seorang pemohon yang, berdasarkan rekod Pihak Berkuasa Melesen, merupakan pemegang lesen tetapi lesennya telah dibatalkan disebabkan kegagalan mematuhi mana-mana peruntukan Undang-Undang Kecil ini atau telah melanggar mana-mana syarat atau sekatan lesen;
 - (c) bagi mana-mana premis yang pada pendapat Pihak Berkuasa Melesen tidak sesuai untuk menjalankan suatu pusat siber dan kafe siber; atau
 - (d) sekiranya pemohon gagal memberikan aku janji bahawa orang yang berkelayakan sahaja akan diambil bekerja.

Larangan

14. Tiada seorang pemegang lesen boleh -
- (a) mengambil bekerja mana-mana orang yang di dalam pengetahuannya atau mempunyai sebab untuk percaya sebagai seorang yang mempunyai watak yang jahat;
 - (b) mengambil bekerja mana-mana orang di bawah umur lapan belas tahun ;
 - (c) mengambil mana-mana warganegara asing untuk bekerja di premis berlesen;
 - (d) membenarkan apa-apa perjudian atau apa-apa bentuk perbuatan yang menyebabkan kacauganggu, gangguan, kecederaan atau kebisingan kepada penduduk di kawasan persekitaran premis berlesen;
 - (e) menayangkan, mempamerkan atau membenarkan pelanggan memuat turun apa-apa gambar atau artikel yang kurang sopan atau lucah di premis berlesen;
 - (f) membenarkan penjualan apa-apa bahan-bahan cetak yang berunsur negatif dan lucah di premis berlesen;
 - (g) membenarkan mana-mana binatang berada di dalam premis berlesen;

- (h) mengadakan apa-apa bentuk hiburan di premis berlesen seperti permainan video, muzik siar pusat dan sebagainya;
- (i) mengunci pintu masuk ke premis berlesen sewaktu perniagaan dijalankan;
- (j) membenarkan pelajar yang berpakaian seragam sekolah masuk atau berada di premis berlesen;
- (k) membenarkan apa-apa penjualan dan/atau menggunakan minuman beralkohol atau rokok atau dadah merbahaya di premis berlesen ;
- (l) membenarkan mana-mana orang atau pelanggan merokok atau menggunakan sebarang rokok atau minuman beralkohol atau apa-apa jenis dadah merbahaya ke dalam premis berlesen;
- (m) menayangkan atau mempamerkan apa-apa gambar yang tidak sesuai dengan adat resam, agama dan nilai murni masyarakat Malaysia;
- (n) membenarkan penggunaan cermin gelap di premis berlesen; atau
- (o) Membenarkan apa-apa aktiviti kurang sihat di dalam premis berlesen.

BAHAGIAN III

PEMEGANG LESEN DAN PEKERJA

Pemegang Lesen

15. (1) Pemegang lesen hendaklah mempunyai kelayakan sepertimana yang ditetapkan oleh Pihak Berkuasa Melesen.

(2) Pemegang lesen hendaklah menyediakan pekerja yang mencukupi pada setiap masa bagi mengawal setiap aktiviti di premis berlesen tersebut.

Buku Daftar

16. (1) Pemegang lesen hendaklah menyediakan buku rekod kemasukan pelanggan dan mengandungi butiran berikut:-

- (a) Nama pelanggan;
- (b) Nombor kad pengenalan atau nombor pasport;
- (c) Alamat terkini ;
- (d) Umur;
- (e) Masa mula dan tamat penggunaan; dan
- (f) Nama sekolah dan kelas (sekiranya perlu)

(2) Pemegang lesen hendaklah memastikan bahawa buku rekod kemasukan diselenggara dan disimpan pada tempoh minima satu tahun dan dikemukakan kepada Pihak Berkuasa Melesen apabila diminta.

Daftar pekerja

17. (1) Pemegang lesen hendaklah mengadakan suatu daftar yang mengandungi nama, nombor kad pengenalan, alamat kediaman, kelayakan, gambar dan apa-apa butiran lain yang berkaitan dengan pekerja, dan hendaklah mengemukakan daftar itu untuk pemeriksaan bila masa dikehendaki oleh Pihak Berkuasa Melesen.

(2) Pemegang lesen hendaklah apabila menggaji seseorang pekerja, menyerahkan butiran pekerja seperti yang disebutkan di bawah perenggan (1) kepada Pihak Berkuasa Melesen dan memaklumkan kepada Pihak Berkuasa Melesen tentang apa-apa pertukaran butiran pekerja ataupun pertukaran pekerja.

Pemeriksaan kesihatan

18. Mana-mana pemegang lesen kafe siber hendaklah memastikan semua pekerja yang menyediakan perkhidmatan makanan dan minuman, menjalani pemeriksaan kesihatan oleh seorang pegawai perubatan setahun sekali atau pada bila-bila masa sepertimana yang diarahkan oleh Pegawai Kesihatan.

Kebersihan pekerja

19. Pemegang lesen kafe siber hendaklah memastikan pekerja yang menyediakan perkhidmatan makanan dan minuman di premis berlesen –

- (a) membersihkan diri sebelum memulakan apa-apa perkhidmatan;
- (b) mengenakan pakaian seragam yang bersih dan sopan yang dibekalkan oleh pemegang lesen;
- (c) tiada meludah, membuang hingus dan merokok atau menggunakan atau menghidu tembakau semasa memberikan perkhidmatan; dan
- (d) tiada luka atau kulit jari atau tangannya melelas semasa memberikan perkhidmatan makanan dan minuman melainkan jika luka atau lelasan itu dibalut dengan sempurna dengan pembalut yang kalis air.

BAHAGIAN IV**PREMIS****Larangan mempamerkan iklan tanpa lesen**

20. Tiada seorang pun boleh mempamerkan iklan tanpa lesen yang dikeluarkan oleh Pihak Berkuasa Melesen di bawah Undang-Undang Kecil ini.

Waktu menjalankan perniagaan

21. (1) Masa perniagaan bagi premis berlesen adalah dari pukul 8.00 pagi hingga pukul 12.00 tengah malam atau pada masa dan jam yang ditetapkan oleh Pihak Berkuasa Melesen.

(2) Pelanggan di bawah umur dua belas tahun hendaklah dibenarkan berada di dalam premis berlesen atau menggunakan apa-apa perkhidmatan yang dijalankan di premis berlesen sehingga pukul 10.00 malam sahaja.

(3) Mana-mana orang yang gagal mematuhi waktu yang ditetapkan di bawah perenggan (1) dan (2) adalah melakukan suatu kesalahan dan apabila disabitkan boleh dikenakan hukuman denda yang tidak melebihi dua ribu ringgit atau penjara yang tidak melebihi setahun atau kedua-duanya.

Pelanggan di bawah umur dua belas tahun

22. Mana-mana pelanggan di premis berlesen yang di bawah umur dua belas tahun hendaklah pada sepanjang masa ditemani oleh ibu bapa atau penjaga yang sah.

Lokasi

23. (1) Suatu premis berlesen hendaklah beroperasi hanya di tingkat bawah bangunan dan keadaan premis hendaklah terbuka sepanjang masa dengan sistem pencahayaan yang mencukupi .

(2) Pemegang lesen hendaklah memastikan kedudukan komputer bagi tujuan melayari internet atau menjalankan apa-apa aktiviti yang dibenarkan hendaklah berasingan daripada aktiviti sampingan yang lain dan ia hendaklah diletakkan dalam ruang yang terbuka, iaitu tidak berbilik dan tidak berpintu.

(3) Suatu premis berlesen hendaklah dibenarkan beroperasi di kawasan yang ditetapkan oleh Pihak Berkuasa Melesen.

Kebersihan premis

24. (1) Pemegang lesen juga hendaklah menyediakan kemudahan tong sampah dan tandas yang mencukupi di premis berlesen.

(2) Suatu premis berlesen hendaklah pada setiap masa menepati syarat-syarat penggunaan dan kelulusan bangunan yang telah ditetapkan dan sebarang pengubahsuaian ke atas bangunan hendaklah mendapat kelulusan daripada pihak Majlis dan agensi-agensi yang berkaitan terlebih dahulu.

BAHAGIAN V

PENGUATKUASAAN

Kuasa masuk dan memeriksa

25. (1) Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor boleh pada setiap masa yang munasabah, tanpa waran dengan tujuan untuk menentukan sama ada syarat atau sekatan sesuatu lesen atau peruntukan Undang-Undang Kecil ini dipatuhi –

(a) memasuki mana-mana premis berlesen; dan

(b) menjalankan apa-apa pemeriksaan di premis berlesen itu.

(2) Jika Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor ada sebab untuk mempercayai adanya berlaku suatu kesalahan di bawah Undang-Undang Kecil ini di mana-mana premis berlesen, maka orang yang tinggal di dalam atau menjaga tempat itu hendaklah membenarkan Pihak Berkuasa Melesen, pegawai yang diberikuasa atau pegawai polis berpangkat tidak rendah dari Inspektor itu masuk dengan bebas ke dalamnya, iaitu apabila diminta oleh mana-mana orang yang tersebut itu, dan memberikan segala kemudahan yang munasabah untuk menjalankan pengeledahan di dalamnya;

(3) Jika tidak dapat masuk ke dalam mana-mana premis berlesen mengikut perenggan (2) di atas, maka adalah sah bagi Pihak Berkuasa Melesen, pegawai yang diberikuasa atau pegawai polis berpangkat tidak rendah dari Inspektor itu, setelah memperkenalkan dirinya dan tujuan kemasukan itu kepada pemegang lesen atau pekerjanya, untuk memasuki ke dalam premis berlesen itu tanpa waran dan menggeledah tempat itu dan bolehlah memecahkan mana-mana pintu luar atau dalam atau tingkap supaya dapat masuk ke dalamnya.

(4) Apabila mana-mana premis berlesen yang hendak digeledah atau diperiksa di bawah Undang-Undang Kecil ini tertutup, maka pemegang lesen, pekerjanya atau orang yang menjaga premis berlesen itu, jika ada, hendaklah atas permintaan Pihak Berkuasa Melesen, pegawai yang diberikuasa atau pegawai polis berpangkat tidak rendah dari Inspektor membuka atau menyebabkan premis berlesen itu dibuka, dan hendaklah membenarkan mana-mana pegawai tersebut masuk apabila diminta olehnya dan hendaklah memberi segala kemudahan yang munasabah bagi menjalankan pengeledahan di dalamnya dan jika premis berlesen itu tidak dapat dimasuki, maka mana-mana pegawai tersebut boleh mengambil tindakan mengikut cara yang diperuntukkan oleh perenggan (3) jika dia mempunyai sebab yang munasabah untuk mempercayai bahawa satu kesalahan di bawah Undang-Undang Kecil ini telah dilakukan di tempat itu.

(5) Bagi maksud pemeriksaan di bawah perenggan 1, Pihak Berkuasa Melesen, pegawai yang diberikuasa atau pegawai polis berpangkat tidak rendah dari Inspektor boleh-

- (a) memeriksa premis berlesen itu;
- (b) menghendaki mana-mana orang mengemukakan barang, buku, akaun, tiket atau dokumen atau benda lain atau memberikan apa-apa maklumat yang difikirkan perlu oleh pegawai yang diberikuasa; dan
- (c) mendapatkan capaian kepada mana-mana atur cara atau data yang disimpan di dalam mana-mana komputer atau mendapat capaian kepada, memeriksa atau menyemak pengendalian, mana-mana komputer dan apa-apa radas atau bahan yang berkaitan yang dia mempunyai sebab yang munasabah untuk mengesyaki digunakan atau telah digunakan berkaitan dengan apa-apa kesalahan di bawah Undang-Undang Kecil ini;

(6) Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor yang menjalankan penggeledahan di bawah Undang-Undang Kecil ini hendaklah diberi akses kepada data komputer sama ada yang disimpan dalam suatu komputer atau selainnya;

(7) Dalam Undang-Undang Kecil ini, 'akses' termasuklah diberi kata laluan, kod penyulitan, kod penyahsulitan, perisian atau perkakasan yang perlu dan apa-apa cara lain yang diperlukan untuk membolehkan data komputer difahami.

Pengeledahan

26. (1) Jika mana-mana Majistret, atas maklumat bertulis dan selepas siasatan yang difikirkannya perlu, mempunyai sebab untuk percaya bahawa—

- (a) suatu kesalahan di bawah Undang-Undang Kecil ini telah atau sedang dilakukan di mana-mana premis ; atau
- (b) apa-apa keterangan atau benda yang perlu untuk penyiasatan apa-apa kesalahan di bawah Undang-Undang Kecil ini boleh ditemui di mana-mana premis,

dia boleh melalui waran, membenarkan Pihak Berkuasa Melesen, pegawai yang diberikuasa atau pegawai polis yang berpangkat tidak rendah dari Inspektor dengan apa-apa bantuan yang diperlukan untuk masuk dan menggeledah tempat itu.

(2) Walau apa pun perenggan (1), jika Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor, ada alasan yang munasabah untuk percaya bahawa -

- (a) suatu kesalahan di bawah Undang-Undang Kecil ini telah atau sedang dilakukan di mana-mana premis; dan
- (b) oleh sebab apa-apa kelengahan untuk mendapatkan waran geledah tujuan penggeledahan itu mungkin akan terkecewa,

maka Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor boleh memasuki tempat itu dan menggeledah tempat itu dan memeriksa mana-mana orang yang semunasabahnya dipercayai olehnya mempunyai kaitan dalam pengurusan mana-mana premis berlesen itu.

Pemeriksaan orang perempuan

27. Tiada orang perempuan boleh diperiksa di bawah Undang-undang Kecil 25 atau 26 kecuali oleh seorang perempuan lain dan pemeriksaan itu hendaklah dijalankan dengan memberikan perhatian teliti kepada kesopanan

Penyitaan

28. (1) Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor yang menjalankan kuasa di bawah Undang-Undang Kecil 25 dan 26, boleh menyita apa-apa benda yang semunasabahnya dipercayai olehnya sebagai mempunyai kaitan dengan, atau dapat memberikan keterangan tentang, pelakuan sesuatu kesalahan di bawah Undang-Undang Kecil ini.

(2) Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor yang menyita apa-apa benda di mana-mana premis berlesen di bawah perenggan (1) hendaklah menyediakan suatu senarai benda yang disita dan dengan segera menyerahkan suatu salinan yang ditandatangani olehnya kepada pemegang lesen, penghuni atau tuan punya premis berlesen itu, atau pengkhidmat atau ejennya, yang berada di premis berlesen itu.

(3) Jika premis berlesen itu tidak berpenghuni, Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor yang menyita itu hendaklah bilamana mungkin menampalkan senarai benda yang disita itu di tempat yang mudah dilihat di premis itu.

(4) Apa-apa benda yang disita di bawah Undang-Undang Kecil ini boleh diterima sebagai keterangan dalam mana-mana prosiding di bawah Undang-Undang Kecil ini.

(5) Jika, oleh sebab jenis, saiz atau amaunnya, tidaklah praktik untuk memindahkan apa-apa benda yang disita di bawah Undang-Undang Kecil ini, Pihak Berkuasa Melesen, pegawai yang diberikuasa atau pegawai polis berpangkat tidak rendah dari Inspektor yang menyita itu hendaklah dengan apa-apa cara menyelak benda itu dalam premis yang di dalamnya ia dijumpai.

(6) Mana-mana orang yang tanpa kuasa yang sah memecahkan, mengganggu atau merosakkan lak yang disebut dalam perenggan (5) atau memindahkan apa-apa benda yang dilak atau cuba berbuat demikian adalah melakukan satu kesalahan.

Pelucuthakan

29. Semua benda yang disita di bawah Undang-Undang Kecil ini boleh dilucuthakkan.

Pelucuthakan jika ada pendakwaan

30. (1) Jika ada pendakwaan yang melibatkan apa-apa benda yang disita di bawah Undang-Undang Kecil ini, maka pelucuthakkan atau pelepasan mana-mana benda sedemikian hanya boleh dibuat mengikut perintah Mahkamah yang di hadapannya pendakwaan itu telah diadakan.

(2) Walau apa pun perenggan (1), jika dibuktikan sehingga Mahkamah berpuas hati bahawa -

(a) suatu kesalahan terhadap mana-mana peruntukan Undang-Undang Kecil ini telah dilakukan; dan

(b) mana-mana benda ialah hal perkara bagi atau telah digunakan dalam melakukan kesalahan itu,

Mahkamah hendaklah melucuthakkan benda itu walaupun tiada seorang pun telah disabitkan atas kesalahan itu.

(3) Semua benda yang dilucuthakkan di bawah Undang-Undang Kecil ini hendaklah diserahkan kepada Pihak Berkuasa Melesen dan hendaklah dilupuskan mengikut arahan Pihak Berkuasa Melesen itu.

Pelucuthakan jika tiada pendakwaan

31. (1) Jika tiada pendakwaan yang melibatkan apa-apa benda yang telah disita di bawah Undang-Undang Kecil ini, maka benda itu hendaklah diambil dan disifatkan telah terlucuthak apabila tamat tempoh satu bulan kalender dari tarikh penyitaannya melainkan jika suatu tuntutan telah dibuat baginya sebelum tamat tempoh itu mengikut cara yang dinyatakan dalam perenggan (2).

(2) Mana-mana orang yang mengatakan bahawa dia adalah pemunya apa-apa benda yang disita di bawah Undang-Undang Kecil ini dan bahawa benda itu tidak boleh dilucuthakkan boleh, sama ada sendiri atau melalui ejennya yang diberikuasa secara bertulis, memberikan notis bertulis kepada Pihak Berkuasa Melesen bahawa dia menuntut benda yang disita itu.

(3) Apabila Pihak Berkuasa Melesen menerima notis di bawah perenggan (2) dia boleh mengarahkan supaya benda itu dilepaskan dengan atau tanpa kos atau supaya perkara itu dirujuk kepada seorang Majistret.

(4) Majistret yang kepadanya rujukan dibuat di bawah perenggan (3) hendaklah mengeluarkan saman menghendaki -

(a) orang yang menuntut bahawa dia adalah pemunya benda yang disita; dan

(b) orang yang daripadanya benda itu disita,

hadir di hadapannya pada hari yang ditetapkan dalam saman itu.

(5) Pada hari yang ditetapkan di bawah perenggan (4), dan setelah dibuktikan bahawa saman telah disampaikan dengan sewajarnya kepada setiap orang yang disebut dalam subperenggan 4(a) dan 4(b), Majistret hendaklah terus memeriksa perkara itu, walaupun mana-mana orang itu tidak hadir.

(6) Jika, setelah selesai pemeriksaan yang dibuat di bawah perenggan (5) berkenaan dengan sesuatu benda, Majistret berpuas hati bahawa -

(a) suatu kesalahan terhadap mana-mana peruntukan Undang-Undang Kecil ini telah dilakukan; dan

(b) benda itu ialah hal perkara bagi atau telah digunakan dalam melakukan kesalahan itu,

Majistret itu hendaklah memerintahkan pelucuthakan benda itu; tetapi jika Majistret tidak berpuas hati sedemikian, dia hendaklah memerintahkan supaya benda itu dilepaskan dan diserahkan kepada orang yang pada pendapatnya berhak kepada benda itu.

Tiada kos atau ganti rugi berbangkit daripada penyitaan boleh didapatkan

32. Tiada seseorang pun boleh, dalam apa-apa prosiding di hadapan mana-mana mahkamah berkenaan dengan penyitaan apa-apa benda yang disita pada menjalankan atau yang berupa sebagai menjalankan apa-apa kuasa yang diberikan di bawah Undang-Undang Kecil ini, berhak kepada kos prosiding itu atau kepada apa-apa ganti rugi atau relief lain melainkan jika penyitaan itu dibuat tanpa sebab yang munasabah.

Kuasa untuk menutup pusat siber dan kafe siber

33. (1) Tanpa menjejaskan perjalanan kuasa yang diberikan kepadanya di bawah Undang-Undang Kecil 26 dan 27 Pihak Berkuasa Melesen boleh, dengan serta-merta mengambil langkah yang difikirkannya perlu untuk menutup mana-mana premis berlesen jika dia berpuas hati bahawa -

(a) telah berlaku pelanggaran mana-mana peruntukan di bawah Undang-Undang Kecil ini atau mana-mana syarat atau sekatan lesen;

(b) penutupan itu adalah perlu untuk kepentingan awam; atau

(c) lesen tersebut telah diperolehi secara tidak wajar atau menyalahi undang-undang.

Kuasa menangkap

34. (1) Pihak Berkuasa Melesen, pegawai yang diberikuasa atau pegawai polis yang berpangkat tidak rendah daripada Inspektor boleh menangkap tanpa waran seseorang yang melakukan di hadapannya atau yang dia dengan munasabah telah melakukan sesuatu kesalahan di bawah Undang-Undang Kecil ini –

(a) jika nama atau alamat orang itu tidak diketahui olehnya dan orang itu enggan memberi nama dan alamatnya; atau

(b) jika ada sebab bagi meragukan yang nama atau alamat itu tepat.

(2) Seseorang yang ditangkap di bawah Undang-Undang Kecil ini hendaklah ditahan dan hendaklah dibawa ke hadapan Mahkamah Majistret dalam tempoh dua puluh empat jam melainkan jika nama dan alamatnya dapat ditentukan terlebih dahulu daripada itu.

Majlis tidak bertanggung atas kehilangan atau kerosakan

35. Majlis, pegawai yang diberi kuasa atau pegawai polis yang menguatkuasakan mana-mana peruntukan Undang-Undang Kecil ini tidak bertanggung atas apa-apa kerosakan atau kehilangan yang berlaku akibat dari penguatkuasaan sedemikian.

Halangan, dsb.

36. Seseorang yang menyerang, menggalang, menghalang atau melengah-lengahkan Pihak Berkuasa Melesen atau mana-mana pegawai yang melaksanakan kewajibannya dengan sah di bawah Undang-Undang Kecil ini adalah melakukan suatu kesalahan dan apabila disabitkan boleh dikenakan hukuman denda yang tidak melebihi dua ribu ringgit atau penjara yang tidak melebihi satu tahun atau kedua-duanya.

BAHAGIAN VI

PELBAGAI

Pendakwaan

37. Tiada pendakwaan boleh dimulakan bagi suatu kesalahan di bawah Undang-Undang Kecil ini kecuali dengan izin bertulis Pendakwa Raya.

Pengkompaunan kesalahan

38. (1) Datuk Bandar, Setiausaha atau Pegawai Undang-Undang Majlis boleh mengkompaun mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan boleh dikompaun dengan membuat suatu tawaran bertulis kepada orang yang disyaki telah melakukan kesalahan itu untuk

mengkompaunkan kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau apa-apa tempoh lanjutan sebagaimana yang dibenarkan oleh Datuk Bandar, Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaunkan di bawah perenggan (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan dengan kesalahan itu hendaklah dilepaskan, tertakluk kepada apa-apa terma dan syarat yang berkaitan.

(4) Kesemua wang yang diterima di bawah Undang-Undang Kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

Penalti

39. Mana-mana orang yang melanggar mana-mana peruntukan Undang-Undang Kecil ini adalah melakukan suatu kesalahan dan apabila disabitkan boleh dikenakan hukuman denda yang tidak melebihi dua ribu ringgit atau penjara tidak melebihi satu tahun atau kedua-duanya dan bagi mana-mana kesalahan yang berterusan dilakukan setelah sabitan boleh dikenakan denda yang tidak melebihi dua ratus ringgit bagi setiap hari kesalahan itu berterusan.

Peruntukan peralihan

40. Apa-apa notis, perintah, kompaun, lesen atau dokumen yang telah dikeluarkan sebelum tarikh kuatkuasa Undang-undang Kecil ini hendaklah terus terpakai dan berkuatkuasa seolah-olah telah dikeluarkan atau dibuat di bawah Undang-Undang Kecil ini sehingga dibatalkan atau tamat tempohnya.

JADUAL PERTAMA

[subperenggan 4 (4)(b)]

KADAR LESEN

	<i>Lesen</i>	<i>fi (RM)</i>
1.	Pusat Siber	50.00 setahun
	(i) setiap satu (1) unit komputer	
2.	Siber Kafe	
	(ii) setiap satu (1) unit komputer setahun	50.00 setahun

JADUAL KEDUA

[subperenggan 4 (3)]

FI PEMROSESAN LESEN

(a) Borang : RM 50.00

JADUAL KETIGA

[perenggan 11(3)]

FI SALINAN LESEN DIPERAKUI

(a) Salinan lesen : RM50.00

Dibuat oleh Majlis Perbandaran Subang Jaya dalam mesyuaratnya pada 29 Jun 2007.

ADNAN BIN HJ MD. IKSHAN
Yang Dipertua
Majlis Perbandaran Subang Jaya